



Sabtu, 28 September 2024
Ogen: Ende-enden Salomo 2: 8-10



Kiam-kiam Mentasi Deleng



Lit sekalak dilaki ngerayu temanna si diberu, “keleng kal ateku kam dekku, udan meder pe kugengken gelah banci ras kam, deleng ras uruk pe kubentasi gelah jumpa ras kena, bagepe lembing ras kelewang pe kualaken gelah kam jadi ingan ku metua”. Ngaloi si diberu,” adi bage, engkai maka la kam reh ku rumah nderbinai bang?”. Nina si dilaki jabapsa, “rintik dek”. Tentu kai si ikataken dilaki e man si diberu ndai labo sue ras kinatana. Maka megati ikataken rayuan hanya sebatas kata-kata si lenga tentu kebenarena.

Ende-enden Salomo enda labo terjeng ende-enden rayuan tapi kerna ende-enden keleng ate penganten dilaki ras penganten diberu si sangana singenan janah teridah pro aktif arah si dilaki guna njumpai atena ngena e. Mbue percakapen pribadi i bas ende-enden Salomo si mempunyai dua bentuk e me dialog ras senandika-solilokui eme percakapen sendiri dengan diri sendiri. Gegeh ende-enden e me kehangatan cinta kasih ras penyerahan diri. I bas perikopta enda, isina eme ende-enden ketedeheh ate. Lit sura-sura si megegeh i bas dua pasang kekasih si paksa sirang, jumpa me ate mulihi erkiteken tedeh si mesangat. Ibas ayat 8, erkiteken ketedeheh ate, sekalak diberu megis sora impalna reh ndahi ia. Impalna e desken belkih si kiam-kiam mentasi deleng guna njumpai impalna si diberu e. I bas ayat 9, si dilaki, ipernehenna impalna ndai arah jendela rumahna dengen ngerana man si diberu e.

Ende-enden Salomo nuriken kerna kebadiaan geluh percintaan manusia janah ngingetken kita kerna cinta kasih Allah. Ende-enden Salomo jadi penawar nandangi seksualitas si la wajar ras kemerosotan kegeluhen perjabun. Apai nge kita metedeh ate nandangi perbulangenta kenca nggo ndekah kita erjabu? Lit denga nge nilai keromantisan i bas kita raduken ras perbulangenta? Ntahsa kegeluhen perjabunta pe nggo hambar, nggo mbergeh, lanai lit hangatna i bas hubungenta selaku perbulangen ras ndehara? Mari si oge ende-enden Salomo enda!